

# Pilipai

## Pol Pilipai bin bi kirop mij ñu kil tikak

**1** <sup>1</sup>Yad Pol. Timoti cir mal Krajs Jisas nop wög gipir rek, ne apil midek niñlig gi, nibep mij aul ñu kil tikebin. Krajs Jisas nop cig gil bin bi ne taun kib Pilipai siñak midebim nibep magilsek mij aul ñu kil tikebin. Nibep magilsek, Krajs bin bi ne midebim okok; Krajs bin bi ne kod midebim bi kib okok; bi kod midep okok kirop wög gi ñibim bin bi okok; nibep magilsek minim nibaul agebin. <sup>2</sup>God Bapi cin abe, Bi Kib Jisas Krajs abe, nibep yimig niñil di tep ger, kapkap mid tep ginimib.

### Pol Krajs bin bi Pilipai okok sobok gil, God nop tep agak

<sup>3</sup>Yad nibep gos niñil God yad nop tep agebin. <sup>4-5</sup>God nop niñ dipek ñin ak tikek, yad Krajs minim tep ak bin bi okok kirop ag ñöligipin ak, nibi per yip gi ñöligipim. Nib ak, nibep magilsek God nop sobok gil, yad per nep miñ miñ gilig gi sobok gipin. <sup>6</sup>Yad nipin, God nibep ned bin bi ne dak ak, nibep ma kirig ginigab me; ne wög tep nibak gi dam dam nibep kod mid dam dam, Krajs Jisas adik gi onigab.

<sup>7</sup>Yad ned okok okok amil, Krajs minim tep ak ag ñenek, bin bi ognap minim pen pen agel niñlig gi, yad kirop eip minim ag amil apil gil, Krajs minim tep ak minim niñid yib mideb ak ag ñi ajpin ak abe, miñi siñaul miñ midebin ak abe, God yip ag lek wög nop gipin ak abe, nibi magilsek per nep yip gi ñibim. Nib ak nep me, yad nibep midmagil lil, gos niñlig gi midebin. <sup>8</sup>God niñip, Krajs Jisas nibep midmagil lip rek ak, yad nibep nib aknib rek nep midmagil lipin.

<sup>9</sup>Yad God nop sobok gil agebin, nibi pen pen midmagil li midem, midmagil lep magil ak am kib gek niñlig gi, nibi minim niñid ak gos niñ tep gil, minim tig asik tep yib ginigabim. <sup>10</sup>Nib ak, kanib akal kanib tep yib ak niñ tep gil, kanib tep yib ar nibak nep amil, nag tep yib gip ar ak nep gi midem me, nibep minim alap ma midenigab niñlig gi Krajs adik gi

onigab. <sup>11</sup>Nib ak, Jisas Kraiss bin bi ne kirop gi ñek, kiri gi tep gipal rek ak, ne nibep ak rek nep gek, nibi gi tep gilig gi nep midem, bin bi okok niñil God yib ne agel ar alaŋ amnaŋ.

**Pol miñ lilak siŋak midek pen Jisas minim tep ak kib amnak**

<sup>12</sup>Pen ai mam sikop niñim! Kraiss minim tep ak ma niñlaŋ, agil, yip miñ lilak ak pen miñ midebin rek, Kraiss minim tep ak amil kib amib. <sup>13</sup>Bin bi gapman bi kib Sisa nop wög gi ñibal okok magilsek abe, bin bi yokop okok koŋai nep abe, yad Kraiss minim ak nep ag ñen, yip miñ lipal ak nipal.

<sup>14</sup>Pen yad miñ midebin ak me, ai mam koŋai yib nep Bi Kib niŋ di kilis gil, ma pirikil, kilis gil God Minim ak miseŋ ag ñibal. <sup>15</sup>Niñid nep, ognap yip milik yapek, cin ak rek nep gon cin yib kib mideŋ, agil, Kraiss minim ag ñibal. Pen ognap, yip gos niŋ tep gil, Kraiss minim ag ñibal. <sup>16</sup>God yip ag lek, Kraiss minim tep ak minim niñid yib mideb ak ag ñibin ak niñil, yip midmagil lil, kiri ak rek nep Kraiss minim tep ak ag ñibal.

<sup>17</sup>Pen bin bi yip milik yapek Kraiss minim ag ñibal okok, gos omal midek, nig gon Pol koslam midenigab, cin pen yib kib dinigabin, agil, nig gipal. <sup>18</sup>Pen ak minim ma mideb! Kiri yip gos tep niñil Kraiss minim tep ak ag ñibal aka yip gos timel niñil Kraiss minim tep ak ag ñibal ak, tap kib ak kiri Kraiss minim tep ak ag ñibal. Nib ak, yad miñ miñ gipin.

**Pol, Kraiss yip kod midenigab, agak**

Yad miñ miñ gipin ak, kisen ak rek nep miñ miñ ginigain. <sup>19</sup>Yad nipin, nibi God nop sobok gilig gi midem, Jisas Kraiss Kaun ne yip kod midek, yad miñ midebin aul söŋ amnigain. <sup>20</sup>Pen yip tep ginigab ak, yad tap tari tari ginigain, komiŋ midenigain aka kimnigain, yad gos sek midil miß goŋ yad kilis gil Kraiss minim tep ne ak ag ñil, yib ne ak agen ar alaŋ amek niŋlig gi yad nabiŋ ma ginimiŋ. Ned nig gak ak, kisen nib aknib rek nep ginimiŋ ak tep. <sup>21</sup>Komiŋ yad ak Kraiss me; kimnigain ak, miñi midebin rek mer, mid tep yib ginigain. <sup>22</sup>Miß goŋ nibaul komiŋ midenigain ak, wög gen tap magil ognap pilnigab. Nib ak, yad kimnigain aka komiŋ midenigain ak ma nipin. <sup>23</sup>Nib ak, yad gos omal mideb, pen kimil am Kraiss eip midenim agil gos nipin. Nig gipkop, yip tep yib gipkop. <sup>24</sup>Pen gos yad alap mideb ak, miß goŋ nibaul midil, nibep gi ñek, mid tep ginimiß ak tap kib. <sup>25</sup>Nib ak, yad ke gos kilis nipin ak, ma kimnigain; nibep gi ñen, Kraiss minim tep ne ak niŋ di tep gilig gi, nop cig di kilis gilig gi, gi damil, miñ miñ gilig gi midenigabim. <sup>26</sup>Nib ak, nibi midebim siŋak kauyaŋ amjakil eip kin midenigabin ak, nibep tep gek, Jisas Kraiss nop miñ miñ yib gilig gi midenigabim.

**Nibi ma piriknimib**

<sup>27</sup>Pen tap kib ak, Kraiss minim tep ak ageb rek nep niñil gi tep ginimiß. Nig genigabim ak, yad midebim siŋak ninigain aka siŋ aul miden minim

apek, nibi gos nokim nep niñil, wög jim ñil kilis yib gil, Krai minim tep ak niñ di kilis gil, bin bi okok ag ñinigabim, yad minim nibak niñil miñ miñ ginigain. <sup>28</sup>Pen bin bi nibep gi timel gipal okok niñil, ma piriknimib. Jim ñil midil ma pirikem, kiri niñnigal, God kirop ñag pak lil, nibep pen di komiñ yoknigab. <sup>29</sup>God tap tep alap nibep ñib ak, nibi Krai nop niñ dipim. Pen God tap tep alap nibep ñib ak, nibi Krai bin bi ne midil, bin bi ognap nibep milik yapek nibi yur dipim. <sup>30</sup>Yad bi ne miden yip gi timel gipal rek, miñi nibep ak rek nep gipal. Nibep eip miden yip gi timel gelak koslam midöligipin ak udin nibi ke nipek. Miñi ak rek nep, yip gi timel gebal ak, bin bi ognap nibep minim ag ñel, nipim.

### Ai mam sikop kirop midmagil lin

**2** <sup>1</sup>Krai nibep yimig niñil dip ak me, nibi kilis dil gos par ma nipim. Krai nibep midmagil lip ak me, nibi gos sek midebim. Kaun ne nibep nab adañ mideb ak me, nibi nop jim ñil midil, ai mam okok pen pen yimig niñil di rep gipim. <sup>2</sup>Nib ak, gos ar nokim niñil, pen pen midmagil lil, gos nibi jim ñil midenimib. Niğ gem me, yip tep yib ginigab. <sup>3</sup>Cin bin bi kib midon, bin bi ognap cinop niñil yib cin agel ar alañ amnañ, agil gos ak ma niñnimib. Cin nep bin bi kib, bin bi ognap okok bin bi sikol agil gos ak ma niñnimib. Bin bi okok kiri magilsek di tep gep bin bi midebal, agil gos ar ak niñnimib. <sup>4</sup>Cin nep mid tep gin, agil gos ak ma niñnimib; bin bi ognap ak rek nep mid tep gilañ, agil gos ak niñnimib.

### Krai Jisas ne gos niñil gak rek ginimib

- <sup>5</sup>Krai Jisas ne gos niñil gak rek ginimib:  
<sup>6</sup>Krai Jisas birarik ped okok  
 per nep God mideb rek nep midek ak pen  
 God kilis mideb rek ak,  
 adip adip midor, agil gos nibak rek ma niñak.  
<sup>7</sup>Gos ne ke niñil,  
 tap ne magilsek okok kirig gil,  
 bi nag wög gep rek midenim agek,  
 nonim nop tik dapek niññañ alap nep lil,  
 bin bi midebal rek nep midek.  
<sup>8</sup>Pen gos yad ke niñil ginim agil ma gak;  
 God agak rek nep gi dad amek niñlig gi,  
 bi timel yib kirop pen yur ñibal rek ak,  
 nop mab kros bak alañ ñag pak lel kimak.  
<sup>9</sup>Krai gak nibak, God nop dam  
 kariñ lim seb kab ar alañ siñak lil,  
 nop yib ke yib, yib ar alañ mideb alap ñek,

- yib magilsek yib ne mok okpi midebal.  
<sup>10</sup> Nig gak ak, Jisas yib ne dap rannig,  
 kiri magilsek,  
 seb kab ar alaŋ siŋak midebal okok abe,  
 lim dai ar wagin aul midebal okok abe;  
 lim dai mok okpi midebal okok abe;  
 kogim yimil,  
<sup>11</sup> kiri magilsek miseŋ agil,  
 Jisas Kraiss ne Bi Kib mideb, agnigal.  
 Minim nibak agenigal ak,  
 Bapi God melik tep ne ak niŋnigal.

### Sip melik pakip ak rek, melik gilig gi midon

<sup>12</sup> Nib ak, bin bi midmagil yad okok. Nibep eip kin midenek ñin ak, minim agen niŋil göligipim. Pen miñi siŋ aul midebin ak, minim nibep agebin nibaul, nib aknib rek nep niŋil ginimib. God bin bi ne karip lim seb kab ar alaŋ siŋak di amnigab agak minim tep ak minim cin agil, per nep God nop gos tep niŋil, ne ageb rek nep niŋil, kilis yib gi midenimib. <sup>13</sup> God ne nep kilis gil midmagil nibep nab adaŋ gos ñek, nop tep ginigab ar ak gin, agil, nig gipim. <sup>14</sup> Milik yapek, pen pen ma agnimib. <sup>15-16</sup> Nibi nig gil, karip lim ar wagin aul midil, bin bi timel yib tap si tap timel gipal okok eip midebim ak pen nibi God ñi pai ne tep yib asiŋ ma mideb midenigabim. Komiŋ ñeb minim ak di bin bi tap si tap timel gipal okok kirop ag ñil, gap magil seb kab alaŋ ñililig lip rek ak, nibi melik ñilnimib. Nib ak, Kraiss adik gi onigab ñin ak, Kraiss minim tep nibep per ag ñibin ak, agen ma yap pak li amib, kiri niŋil ar nibak nep gipal, agil, miñ miñ yib ginigain.

<sup>17</sup> Nibi God nop niŋ dipim ak, nop tap pak sobok gi ñel nop tep gip rek ak gip. Pen Kraiss minim tep ak per ag ñen yip ñag pak lel lakañ yad soŋ gi yonigab ak, minim ma mideb. Ak yokop ñig wain di tap pak sobok gipal ar ak soŋ gipal rek ak mideb. Nibi God nop niŋ dipim ak tap pak sobok gep; lakañ yad soŋ gi yonigab ak ñig wain ar ak soŋ gep. Nig gek, cin sek God nop tap sobok gi ñon, nop tep ginigab ak niŋil, nibep eip miñ miñ ginigain. <sup>18</sup> Nib ak, nibi ak rek nep miñ miñ gil tep gek niŋlig gi midenimib.

### Timoti ninigab

<sup>19</sup> Nibi mid tep gipim aka titi gi rek midebim ak ma nipin. Bi Kib Jisas yau agek, ulep mideb Timoti nop ag yoken am nibep niŋil apil minim nibak agek, yip tep ginimiŋ. <sup>20</sup> Timoti bi tep, yad nibep yimig niŋil midmagil lipin rek, ne nibep ak rek nep yimig niŋil midmagil lip. Timoti rek bi alap yad eip siŋaul ma mideb. <sup>21</sup> Bi ognap nig ma gipal; kirop ke

tep ginimiņ rek gos niņil gipal; Jisas Kraiss nop tep ginimiņ rek gos niņil ma gipal. <sup>22</sup>Timoti ne bi tep yib mideb ak uđin nibi ke bir niņim. Ne ņi yad ke rek midek, cir bi apil mal rek Jisas minim tep ak ag ņi ajpir. <sup>23</sup>Yad gos nipin ak, ulep mideb miņ midebin ak minim agel niņil, yip tap tari ginigal minim ak Timoti nop agen, ne amil nibep ag ņinigab. <sup>24</sup>Gos yad nipin ak, Bi Kib yau agek, ulep mideb yad ke ak rek nep midebim siņak ninigain.

### Epaprodaitas ninigab

<sup>25</sup>Pen nibi mam cin Epaprodaitas nop ag yokem apil, yip kod midek niņlig gi, cir ami bi gipal rek kilis gil God wög ne ak jim ņil gipir. Pen miņi nop ag yokem kauyaņ midebim siņak adik gi ninigab. <sup>26</sup>Ne nibep midmagil lil am niņnim ag gos niņip. Nibi nop tap gak aglak ak niņil yimig nipek ak ne niņil gos par niņeb. <sup>27</sup>Epaprodaitas nop tap kib gek, mer kimak ak, God nop yimig niņil gek, warik amnak. Pen nop nep mer; God yip ak rek nep yimig niņak. Mam nibak kimbkop, yip yimig yib gipkop. <sup>28</sup>Nib ak, Epaprodaitas nop kasek ag yokem amjakek, nibep tep gek niņlig gi, yad gos par nipin rek ma niņnim. <sup>29-30</sup>Nibi ned par kib okok midem, bi yip kodep alap ma midek, bi nibi nibak agem, Kraiss wög ar ak ginim agil apil yip kod midil, mer kimak. Bi ognap akniņ rek gipal okok kirop di tep ginimib. Nib ak, ne amjakek, Bi Kib nop wög gip mam cin ak apeg, agil, nop ag wasu dil miņ miņ yib ginimib.

### Kraiss nop niņ dipin ak me, God yip niņil bi komiņ tep yad ageb

**3** <sup>1</sup>Ai mam sikop. Yad minim ulep ag dai junig gil, nibep minim alap sek agniņ gebin. Bi Kib bin bi ne midebim rek, miņ miņ ginimib. Minim nibep ned agnek ak, kauyaņ ņu kil tiknim agen, yip miker ma gip. Kauyaņ ņu kil tikil agen mid tep genigabim ak tep.

<sup>2</sup>Kain saköl okok niņ tep gilig gi midenimib. Kiri tap timel yib gipal. Kiri miņ goņ tib gi rik gipal. <sup>3</sup>Cin me God bin bi ne yipid gil midobin. Tari ginig: God Kaun ne ak cinop eip midek, God nop sobok gipin. Kraiss Jisas nop cig gil tep gek niņlig gi midobin ak me, God bin bi ne yipid gil midobin. Cin miņ goņ tap okok gipal gos niņil God bin bi ne ma midonigabin, agil gos nipin ak me, God bin bi ne yipid gil midobin.

<sup>4</sup>Pen miņ goņ tap okok gipal minim ak agil, cin bi kib midobin agniņal ak, yad agniņain, kiri miņ goņ tap niņ okok bi kib mer, yad ke nep bi kib midebin. <sup>5</sup>Yip tik dapil ņin akniņ jil ak midil, waņ wak yad ak tib gi rik gilak. Based acik cin Isrel, ņi ne kisen Benjamin waņin ak me, yad bi Hibru yipid gil midebin. Pen Juda lo minim apal ak, yad bi Perisi midenek rek, minim nibak ageb rek magilsek niņ tep gilig gi midöligipin. <sup>6</sup>Juda minim nibak niņ damil kilis yib gil, Kraiss bin bi kirop niņil, gi timel yib göligipin. Cin Juda bin bi lo minim sikol sikol ke ke okok göligipin rek, bi kib okok yip

minim alap agnimel rek ma lak. <sup>7</sup>Pen kisen yad gos niŋ tep gil, ned göligipin ar ak gi tep ma göligipin ak niŋil, Kraiŋ yip giŋ ar nep tap tep agil gos ar nokim nibak nep niŋlig gi, ned göligipin tap okok magilsek tap yokop rek pis nep kirig ginek. <sup>8</sup>Pen ned göligipin tap okok nep mer. Gos yad niŋin ak, Kraiŋ Jisas Bi Kib yad nop bir niŋin ak tap kib yib. Tap ognap okok magilsek tap yokop yib. Kraiŋ Jisas nop wög ginim, agil, tap okok magilsek kirig ginek. Yad Kraiŋ bi ne midil, nop niŋ tep ginim, agil, tap yokop okok magilsek tap acip acip rek niŋin. <sup>9</sup>Yad Kraiŋ eip jim niŋ nep midenim. Yad Juda lo minim ar ak genigabin ak, God yip niŋil bi komiŋ tep yad ma agnigab. Pen Kraiŋ nop niŋ dipin ak me, God yip niŋil bi komiŋ tep yad agnigab. <sup>10</sup>Nib ak, Kraiŋ nop niŋ tep gil, ne warikak ak kilis nibak niŋil, ne miker kib dak ak rek miker dil, ne kimak ak rek kimil, <sup>11</sup>ne warikak ak rek God gek yad ak rek nep wariknigain.

### Pol kilis gil gak

<sup>12</sup>Yad tap agesin nibaul magilsek dil bi asiŋ ma mideb midebin ak ma agebin. Pen Kraiŋ Jisas yip dek bi titi bi rek midenigain agil gak ak rek dinim, agil, kilis gil kasek amebin. <sup>13</sup>Ai mam sikop. Tap tep nibak bir dipin agil ma agebin. Pen yad gos nokim alap mideb. Ned göligipin ak saköl gil, kilis gil tap tep kanib siŋak niŋil kasek amebin. <sup>14</sup>God tap tep yip niŋigab ak dinim agil gos abab gek niŋlig gi, kanib siŋak yipid gil nep kasek amil, resis dai junigab nag nibak kasek amebin. God yip sik agil tap tep niŋigab ak, Kraiŋ Jisas yip gek kariŋ lim seb kab ar alaŋ siŋak per midenigain. <sup>15</sup>Cin bin bi God nop cig tep gi midobin okok magilsek gos ar nibak rek nep niŋin. Pen minim ar ognap gos ke niŋenigabim ak, God nibep gos yipid gil niŋeb magil ak yomnigab. <sup>16</sup>Pen Kraiŋ minim tep niŋ dipin ak ma kirig gin; minim nibak niŋ tep gilig gi gon amnimiŋ.

<sup>17</sup>Ai mam sikop. Nibi yad giŋin rek gi damil, bin bi ar nibak rek gel amonimiŋ bin bi okok kirop niŋil dinimib. <sup>18</sup>Tari ginig: nibep per agöligipin rek sil agil kauyaŋ agebin, bin bi koŋai nep okok tap si tap timel gil, Kraiŋ mab kros bak alaŋ kimak ak kausal maual rek midebal. <sup>19</sup>Kiri kariŋ lim timel eyaŋ ak amnigal. Mib goŋ kiri gos giŋ ar ak nep gos niŋal. Tap si tap timel gel nabiŋ gipkop pen kiri bi okok kirop miseŋ apal. Tap lim dai ar wagiŋ aul mideb okok nep gos niŋal. <sup>20</sup>Pen kariŋ lim cin ak kariŋ lim seb kab ar alaŋ siŋak mideb. Seb kab ar alaŋ siŋak nib, Bi bin bi kirop di komiŋ yoknigab ak, Bi Kib Jisas Kraiŋ, kod midobin. <sup>21</sup>Ne Bi kilis yib agek, tap okok magilsek minim ne niŋil kisen ginigab. Bi Kib Jisas Kraiŋ kilis nibak gek, mib goŋ niŋak cin ki gi yowip okok gek, mib goŋ tep yib, mib goŋ ne ke rek lek midenigabin.

### Mid tep ginimib

**4** <sup>1</sup>Nib ak, bin bi tep yad okok. Par kib siŋ aul midil, nibep midmagil lil, am niŋnim, agil gos ak niŋlig gi midebin. Nibep gos niŋil, miŋ

miñ gilig gi gos sek midebin. Minim ñu kil tikesin nibaul niñil, nib aknib rek gil, Bi Kib niñ di kilis gilig gi midenimib.

<sup>2</sup>Yuodia eip Sintiki eip, yad nirep bin omal agebin, niri Bi Kib ak nop gos nipir rek, pen pen ma agnimir, jim ñil midenimir.

<sup>3</sup>Pen bi yad eip jim ñil wög gipir, nep agebin, bin nib omal kirop gi ñek, mid tep ginimir. Ned bin nib omal, yad ak, Klemen ak, bin bi ognap okok eip jim ñil, Kraiss minim tep ne ak bin bi okok ag ñoligipin. God yib kiri buk per midep eyañ tikek mideb.

<sup>4</sup>Bi Kib nop cig gil, miñ miñ gilig gi midenimib. Kauyañ ak nibep agebin, miñ miñ gilig gi midenimib! <sup>5</sup>Bin bi sain tep yib midem, bin bi okok magilsek niñnigal. Bi Kib ulep onigab. <sup>6</sup>Gos kib ma niñnimib. God nop ag niñlig gi, tep aglig gi, tap magilsek nop sobok gilig gi midenimib. <sup>7</sup>Nibi Kraiss Jisas nop cig tep gi midebim ak me, God cibur sain sain gos midmagil nibep nab adañ lek, nibi pirikil gos par ma niñnigabim. Bin bi nep midobin rek, God titi gil nig gip ak ma nipin.

<sup>8</sup>Ai mam sikop. Yad minim ulep ag dai junig gil, nibep minim alap sek agniñ gebin.

Tap tari ak niñid;

tap tari ak yipid gil;

tap tari ak kab rek;

tap tari ak asiñ ma mideb;

tap tari ak midmagil lep;

tap tari ak bin bi niñil miñ miñ gipal;

tap tari ak tep yib;

tap tari ak bin bi niñel tep gip;

tap nib okok nep gos niñlig gi midenimib.

<sup>9</sup>Nibep eip midil, tap tari gen nipek ak, minim tari agen nipek ak, nipek rek nep ginimib. Nig genigabim, God nibep eip midil, gos midmagil nibep kod midek, gos par ma niñnigabim.

#### **Pilipai bin bi Pol nop tap ñelak, miñ miñ gak**

<sup>10</sup>Yad agnek e, yip saköl gipim ag niñnek ak pen mer; yip gos niñlig gi midebek pen kanib ma midek niñil nibi yip tap alap ma yokpek. Pen miñi yokpim rek, yip gos niñlig gi midebim ak niñil, Bi Kib cin ak nop miñ miñ yib gipin. <sup>11</sup>Ñin ognap yokop midebin gos ak niñil ma agebin; Bi Kib yip gos ñek miñi nipin, yip tari tari ginigab ak, minim ma mideb. <sup>12</sup>Ñin ognap tap koñai mideb; ñin ognap ma mideb. Mideb ñin okok ñibin; ma mideb ñin okok yokop midebin. Nibak, tap koñai midek aka ma midek, gos kib ma nipin. <sup>13</sup>Bi Kib yip kod midil kilis ñib ak me, yip tari tari ginimim agniñab ak ginigain.

<sup>14</sup>Pen yip miker gek, nibi yip gos niñil tap ñibim ak, gi tep yib gipim.

<sup>15</sup>Nibi Pilipai bin bi nipim, nibi Jisas minim tep ne ak ned yib nipek ñin

ak, yad Masedonia Propins kirig gil, God Minim ag ñi ajöligipin, God bin bi ne midelak okok ognap yip tap ma ñilak. Nibi Pilipai bin bi nep yip mani tap okok ñöligipim. <sup>16</sup>Pen amil taun kib Tesalonaika midenek ñin ak, yad tap alap ma midek pen nibi yip mani tap okok per ñöligipim.

<sup>17</sup>Pen mani tap okok nen agil ma agebin; gos nibi ke niñil tap abramek ñem, God nibep miñ miñ yib gil, nibi gipim ak saköl ma ginigab, agil agebin.

<sup>18</sup>Tap yokpek magilsek dipin. Bi nibi Epaprodaitas nop mani tap okok ñem, dapil yip ñek, miñi tap koñai yib midek mid tep gipin. Yip tap yokpek nibak, God nop tap dagil ñel, ki tep apek nop tep gip rek ak gipim. <sup>19</sup>Nibi Krajs Jisas bin bi ne midebim ak niñil God yad bi gep yib ak nibep kod midil, tap tari ma midonimiñ okok magilsek nibep ñinigab.

<sup>20</sup>Nib ak, God Bapi cin yib ne per nep per nep agon ar alañ amnañ. Nib akniñ rek tep.

#### **Minim dai magil ognap**

<sup>21-22</sup>Krais Jisas bin bi ne bi kib Sisa eip midebal okok, nibep Krajs Jisas bin bi ne midebim okok, “Nibi midebim?” agebal. Nib ak me, God bin bi ne siñaul midobin magilsek, nibep Krajs Jisas bin bi ne midebim okok magilsek, “Nibi midebim?” agobin.

<sup>23</sup>Bi Kib Jisas Krajs nibep magilsek yimiñ niñil kod midonimiñ.